

四庫全書

史部

欽定四庫全書

史部

平定準噶爾方略正編卷六十八至七十一

詳校官監察御史臣孫家賢

通政使司副使臣莫瞻菴覆勘

總校官進士臣朱鈴

校對官編修臣朱紱

謄錄監生臣劉佳瑋

欽定四庫全書

平定準噶爾方略正編卷六十八

乾隆二十四年二月丙辰

議購買俄羅斯馬匹事宜

喀爾喀親王桑寨多爾濟奏言查內地商民於

恰克圖購買俄羅斯皮張等物又於布里雅特

以布定茶葉換易馬匹牲隻似於軍需有益應

請

旨交與管理貿易司員或以官銀令商民承辦或仍令商民置買每年可得馬一二千匹奏入得

旨軍機大臣議奏尋議收買俄羅斯馬匹牲隻事屬可行但必須遴選幹員前往查理藩院員外郎佛祿曾在恰克圖辦事頗悉該處情形戶部郎中范清注習於貿易張家口恰克圖等處又有伊商夥臣等酌議派令前往遣人詢訪俄羅斯馬匹實價再動支官銀購買仍不露官辦形迹

俟交易後派員送至張家口將駟馬彌補牧羣
欠數騾馬兒馬交總管等歸入牧羣孳生於軍
需備用自有裨益奏入

上從之

戊午

諭四川總督開泰等接濟甘省錢文

上諭軍機大臣曰甘省連年承辦軍需錢價未免昂
貴西安鼓鑄爐座無多從前已屢次協撥現存無

欽定四庫全書

平定澤潞兩方略正編
卷六十八

幾四川為產銅之區添爐鼓鑄錢文必多若由水路運至略陽轉送甘省即增添運費較之甘省現在錢價尚當減省著傳諭開泰查明該省存局餘錢儘其所得撥出數萬串委員陸續運至略陽交陝省委員轉運甘肅一帶視錢文之多寡酌定成數搭放兵餉以每銀一兩折錢八百文為率如有贏餘即設局減價兌換并計其兌換銀數報部於撥解甘省協餉時照數扣除改撥川省抵餉以省

往返運送之煩并傳諭明德知之

壬戌

賜哈薩克阿布勒巴木比特等

勅書

皇帝勅諭哈薩克汗阿布勒巴木比特阿布賚阿布
勒比斯等昨據將軍等具奏爾等遣俄羅斯蘇爾
統等代請朕安由烏里雅蘇台伴送至京朕嘉爾
等誠悃疊申宴賚念爾阿布勒巴木比特等遠在

欽定四庫全書

平定準噶爾方略正編

卷六十八

三

外藩若照內地扎薩克授以爵秩恐爾等有拘職
守前阿布賚等遣使入覲時已傳諭及此爾阿布
勒巴木比特亦各依舊俗安居游牧庶無擾累爾
等如遣使輸忱朕亦不靳恩賞其賜爾阿布勒巴
木比特等緞疋器什茶葉若干使臣歸日爾等其
各祇受又賜來使等衣物銀兩若干及使臣隨僕
等緞疋銀兩俱諭爾等知之又昨准俄羅斯部落
來文有爾等哈薩克舊係伊屬之語朕命所司傳

諭云前大兵進勦厄魯特抵哈薩克邊界伊等慕
化投誠我大國之體自當撫納非若汝外邦動以
威力相加與之約誓責其貢賦亦未嘗禁其服屬
他國也嗣後爾等即與俄羅斯往來亦所不校其
勉輸誠悃永享無窮之福特諭

諭定邊左副將軍成衮扎布等辦理哈薩克來使歸
途事宜

上諭軍機大臣曰哈薩克請安使臣歸途仍令納旺

照管據伊等奏稱沿途貿易及買蒙古人口請旨
遵行朕諭以貿易之事係爾等私情不便傳諭至
蒙古等皆朕臣僕與爾等一體而喀爾喀尤服屬
年久自不肯售賣人口或新附之都爾伯特扎哈
沁等部落有此舉動只得聽其自便亦不能預為
期約再伊等稟告軍機大臣欲將留於軍營休息
之人一體賞賜恐此次伴送伊等又復言及亦當
明白曉示以此等人並未入覲例不應賞念其久

住客邸推廣仁恩每人賞緞一端再此等哈薩克
使人等所攜賞物頗多駝隻不足必請添補當告
以向無官辦之例或自行僱覓我等仰體皇仁代
為傳集尚屬可行即以伊等賞項辦理若再三懇
求亦止此次酌量辦給後不為例其駝隻仍交納
旺帶回斷不可曲順其情致伊等習以為常無所

限制

癸亥

宣諭哈寧阿罪狀

上諭大學士曰哈寧阿以軍行失律解京鞠訊據其詞與雅爾哈善相符且將雅爾哈善種種謬戾乖張失機債事情節指陳如繪是雅爾哈善雖已伏法實不足以蔽其辜夫雅爾哈善既為將軍而哈寧阿即其叅贊以將軍罪狀如此為叅贊者自當以軍國之計為重據實叅奏乃隱忍貽悞又從而附和之滿洲世僕豈宜出此且哈寧阿又非他人

可比自伊父哈達哈獲罪經朕加恩矜宥并予以
自効之途伊苟有人心念及伊父亦將倍加感奮
矧軍旅重寄三軍之命繫焉顧因循玩視可乎核
哈寧阿之罪正與雅爾哈善等應即正典刑以肅
軍紀第以叅贊究屬相助為理之人前哈寧阿曾
隨將軍兆惠由濟爾哈朗力戰而出雖現在所犯
情罪斷難稍貸仍念伊前勞暫緩正法著監候秋
後處決以示寬典朕用人行政事無鉅細一秉虛

公自問信賞必罰毫無偏倚若事關軍務尤期法在必行然使其人尚有微績可錄亦不忍竟沒臨時必量予加恩此中權衡輕重實可下對天下臣民今將哈寧阿留候秋讞著通諭中外俾衆共知之

甲子

定邊右副將軍富德等疏奏大敗賊衆於呼爾

瑞

富德等奏言臣舒赫德等於十二月初四日從阿克蘇領兵三千五百餘名馬一千七百餘匹途次牽趕牧放前至巴爾楚克臣富德領兵三百餘名於十二月二十五日相會一面遣人催送馬匹二十九日臣等捉生詢問據供霍集占聞知大兵來援現在并力攻取將軍兆惠營寨等語臣等即將平常兵丁及一切行李俱酌量存留令進勦兵丁乘騎駝隻前進正月初六日

至呼爾璫逆賊霍集占領騎賊五千餘迎戰臣
富德臣舒赫德將中軍兩翼馬兵六百餘名令
努三愛隆阿帶領又叅贊大臣福祿領隊大臣
永慶

乾清門侍衛瑪璫瑚什公特通額額訥慎訥齊訥
正黃旗額爾登額塔爾海正白旗額爾登額科
普薩烏爾圖納遜棟保蒙固勒伊達木扎卜巴
圖魯侍衛老格占頗圖伍岱瑪呼占丕納福永

永德豐訥亨豐安等各按部伍排列鎗礮其索
倫察哈爾善射步兵分列兩翼從巳至申與賊
相持合戰十餘次賊始敗潰提督豆斌領中軍
鎗礮攻奪賊人所據高岡臣富德努三領左翼
兵奪取逆賊帳房及旗纛鎗礮等物臣舒赫德
愛隆阿領右翼兵將據滿為營之賊衆擊敗數
次計追奔十五里勦賊百餘人受傷者甚衆我
兵多係步行所有馬匹多因疲乏及中鎗礮倒

斃僅存百餘不能馳驟是晚收兵覓水安營次
晨領兵前進途遇戈壁賊衆又踞高阜迎戰臣
等以鎗礮攻擊賊即退避步兵不能追及相持
一晝夜初八日賊知我兵乏馬四面進攻官兵
奮勇迎敵擊退數次多有勦殺賊恃其衆仍合
圍拒守臣等與各官兵因駐兵砂磧兩晝夜無
水吞咽零星冰塊人馬俱乏惟望解送馬匹計
日應到臣等是夜布列方陣覓有水之地安營

一面遣人往迎臣阿里衮通信行未十里聞賊在後施放鎗礮我殿後之侍衛額爾登額豐訥亨豐安領健銳營兵接戰賊遂敗退及我兵起行賊復來挑戰天曉至沁達勒河賊又奪我渡口即整兵嚴守賊不能奪相持一晝夜臣等計議逆賊知我馬力不足敢於侵擾若不奮勇勦殺無以示威軍營尚有可用之馬五十餘匹給與精壯兵丁乘騎再派健步兵丁二百名往襲

賊營初九日夜月落後行至卡倫適臣阿里衮
已遇臣等通信之人即挑選馬駝趲行與襲賊
兵會合臣阿里衮鄂博什分兩翼奮呼衝突盡
力勦殺初十日黎明領兵回營聞擊敗賊人尚
有吹角招集逃衆者臣努三鄂博什等領兵從
右攻擊臣阿里衮愛隆阿自左夾攻臣富德居
中追勦殺賊數百人收獲鳥鎗長槍及疲乏馬
匹無算詢問俘獲人口據稱賊人被勦者千餘

受傷者甚衆交鋒之初波羅泥都烏鎗傷脇昇
入城中旋回喀什噶爾又所殺巴圖爾十五人
大伯克數十人等語計自正月初六至初十日
五日四夜領隊大臣侍衛官兵等俱奮勉勦賊
至健銳營兵丁訓練有年火器精利爭先殺賊
陣亡者二十餘名得傷者七十餘名滿洲吉林
索倫察哈爾綠旗兵丁陣亡七十餘名其大臣
官兵內得傷者如提督豆斌脅前總管三都卜

唇上侍衛額訥慎腰間塔爾海肩背占丕納手指俱中鳥鎗傷侍衛瑪瑞腮頰齒牙項臂受傷數處老格肩骨及左腿中槍未損此次奮勉官兵內酌量獎賞孔雀翎藍翎與陣亡得傷官兵分別造冊送部臣等復詢知將軍兆惠等堅守待援正欲通信適兆惠營中聞臣等鎗礮之聲已知援兵俱集遣索倫兵二名伯克霍集斯所屬回人二名賁文知會臣等云上年十月十三

日領兵至通古斯魯克遇馬步賊衆二萬餘人
我官兵千餘人內渡河者僅五百餘名雖有斬
獲而馬力疲乏被賊遮圍暫行據守賊亦掘濠
立寨相持閱今三月晝夜攻戰賊人初引水灌
營我兵即掘濠宣洩又以葦埽蔽體來犯即用
火焚燒又掘溝伏身前進即乘高擊退本年正
月初八日遙聞北面有鎗礮之聲想援兵已至
即乘夜選兵千餘名製備雲梯兩路衝突燒燬

賊營陣斬千餘人生擒五百餘人獲旗纛軍器
無算即欲會同勦賊奈步賊雖敗而騎賊尚於
遠處偵伺未敢輕動因遣回人畢齊起等間道
宵行移咨將軍大臣等現在何處及勦賊情形
并作何籌畫來援會勦現在軍營人等俱安好
無恙等語臣等即當定期夾攻備文付來人賈
回今臣阿里衮送到馬一千匹駝四百隻臣等
乘賊敗潰整兵往援仰賴

聖主天威務期擒獲渠魁以告成功奏入

上諭大學士曰據富德等奏報正月初六日統領官
兵行至呼爾璦逆酋霍集占等率賊騎五千抗拒
官軍奮勇轉戰至初九日我兵因馬匹行遠力乏
不能悉行斬獲是夜月落後適叅贊阿里衮送馬
已到正遇分遣勦賊官兵即與鄂博什分為兩翼
謹呼馳突陣戮賊衆甚夥至初十日天曉收兵回
營計五日四夜殺賊千餘及中傷者無算初六日

交戰時逆酋波羅泥都脅間中鳥鎗傷甚劇賊昇
之入城旋回喀什噶爾計陣戮賊巴圖爾十五名
大伯克數十名至將軍兆惠在營中固守聞鎗礮
聲知援兵已至即遣索倫兵回人等貴文通信等
語覽奏深為感慰此皆

上蒼默垂眷佑諸大臣以及官兵等忠誠敵愾所致富
德數年來宣力勤勞此次奮勇督勦厥功懋著著
加恩封為三等伯爵舒赫德雖屢經獲罪今知奮

勉自贖亦屬可嘉阿里衮前雖未著成勞今送馬
濟軍如期集事且會同勦賊擊殺甚多朕心深為
獎許計此次勦賊有功自領隊大臣以上人人踴
躍自効提督豆斌率中軍鎗礮鼓勇前進奪取賊
營脅受鎗傷著加恩一體議叙并各賞給世職所
有陣亡及効力之侍衛官員兵丁等俟兆惠富德
查明造冊報部到日一并照例優加敘卹富德等
摺奏及兆惠咨文併發又

諭曰覽富德等捷奏甚屬奮勉伊從前奏請趨行前進及舒赫德催督各隊兵馬陸續進發俱甚合機宜若不如是辦理焉能勦殺賊衆通信軍營朕心深為嘉悅但逆賊霍集占等喪胆之餘惟有逃遁今各城回衆皆降自必慮其縛獻惟大兵追勦後北路駐兵甚少伊曾住伊犁熟其道路或就彼往投俄羅斯亦未可定兆惠富德等宜籌堵截之策且伊二人既會兵一處足以辦事而阿克蘇駐劄

需人著舒赫德即回阿克蘇辦事明瑞亦遵前旨
馳驛來京至舒赫德駐劄阿克蘇時有烏什回人
托克托默特來投據告稱將軍等於營中掘得窖
粟及得馬千匹駝千隻波羅泥都已回喀什噶爾
等語今覽兆惠咨文伊等並未收獲馬駝而富德
又奏稱波羅泥都臨陣負傷昇入城中是托克托
默特所言盡屬子虛或係霍集占等遣來詐降以
懈我軍心自應嚴加窮詰著永貴玉素富等查明

托克托默特現在何處即嚴拿送往軍營交與兆惠審理俱著傳諭知之又

諭曰此次應援軍營雖勦賊甚多而逆賊等巢穴尚存自必勉強支吾萬一員峒固守而我馬力尚未甚足仍須駐候前曾諭及我兵若回阿克蘇則多勞往返即就近駐劄和闐方妥惟是駐兵之後一切糧運自必由烏什一路行走倘逆賊等窺我北路兵少由間道抄截亦未可定故阿克蘇地方最

要已諭舒赫德速回辦事矣至官兵亦不必俱聚和闐或分駐阿克蘇則糧運易集而聲援亦接若業已擒獲渠魁即無庸置議總之伊等身在軍前惟宜相機辦理固不必拘泥朕旨亦不可坐失事會也著將辦理情形作速奏聞

乙丑

諭定邊將軍兆惠等酌調布魯特兵丁事宜

上諭軍機大臣曰據清馥奏稱遵旨詢問布魯特使

臣車里克齊等以派兵協勦逆回一事據稱行至游牧後情願量力出兵協助將軍大臣等語前經舒赫德奏稱侍衛布占泰等見車里克齊之弟言及派兵伊等以游牧事務係明伊勒哈管理復因天寒雪盛布占泰暫行回營今雖據伊等懇請自効但所言亦恐無定惟視我之情形我兵力精銳則踴躍隨行或稍覺平常即從中觀望此亦外藩情勢之必然者伊等既有此言若果踐前約兆惠

等亦酌量獎賞調用如可以不需自當相機發遣
著因便傳諭知之

恩授總管噶岱默特為頭等侍衛

上諭軍機大臣曰富德等奏稱回人噶岱默特經將
軍兆惠派同愛隆阿駐防要隘後同回阿克蘇又
隨軍前進熟習沿途情形頗得其力等語噶岱默
特著加恩授為頭等侍衛有回城伯克缺出即令
其管理

金史卷六十八
命巴圖魯侍衛瑪瑞等來京

上諭軍機大臣曰昨諭明瑞遵前旨馳驛來京詢問
軍前情形今思侍衛瑪瑞老格等此次甚屬効力
且得傷可念自應來京休息而新派之侍衛等似
老格得傷者尚有幾人著兆惠等查明令其分起
來京

丁卯

申諭侍衛官長保等趲送馬匹事宜

上諭軍機大臣曰清馥奏稱詢知侍衛官長保等帶領達什達瓦兵丁由烏里雅蘇台哈布塔克拜塔克直抵烏魯木齊因將伊等應得錢糧送至烏魯木齊辦給又達爾黨阿等自巴里坤至烏魯木齊需用熟識水草之嚮導等已於索倫察哈爾厄魯特等兵丁內派出二百餘名等語所辦尚是從前諭官長保等由巴里坤會同達爾黨阿等行走原以厄魯特等頗悉沿途情事今既就近前往自無

庸議若伊等接得前旨仍回巴里坤更為妥協但
厄魯特等雖稱熟識水草而我兵豈遂無歷練之
人可傳諭達爾黨阿等自巴里坤前往務嚴飭新
派官兵沿途加意照看并勦殺嗎哈沁等或葉爾
羌喀什噶爾等處有厄魯特及回人逃來即行勦
殺以清臺路庶馬匹不致被竊而渠魁亦難漏網
矣

命選派俄羅斯送出之索倫察哈爾等來京

上諭軍機大臣曰據喀爾喀親王齊巴克雅喇木丕勒等奏報俄羅斯將舍楞等帶往之察哈爾佐領巴彥察克等十八人查出送至恰克圖等語可傳諭成衮扎布等巴彥察克等十八人被陷得脫殊可軫念伊等至烏里雅蘇台即於索倫察哈爾厄魯特內擇其明白曉事者各一人賞給行裝馳驛來京以備詢問餘十五人酌量賞給令其各回游牧其來京之人不必派員照管

戊辰

諭阿克蘇辦事侍郎永貴派兵防送糧運

上諭軍機大臣曰永貴奏稱現在派駝二百五十隻
將回人所交米麪及弓箭火藥鉛丸酌分馱載又
趕送羊一千五百隻前往軍營等語接濟軍需甚
關緊要此時將軍等正與逆賊相持恐有賊黨乘
間搶刦可傳諭永貴於起運時多派官兵沿途防
護免致疎虞

諭辦理屯田副都統定長酌派聽調之綠旗兵丁

上諭軍機大臣曰定長奏稱新派綠旗兵丁五千名
駐吐魯番聽候調遣已會同總兵楊寧將老弱者
撤回其名糧於屯田兵丁內充補仍飭該管官嚴
加約束等語此次派出綠旗兵前諭聽候兆惠行
文或調令進剿或留派屯田今時值春耕與其坐
糜糧餉莫若先事耕作可傳諭定長即將兵丁五
千名分發吐魯番附近屯田處所令其開墾庶伊

等不致間住滋事於屯務亦有裨益

已巳

定邊將軍兆惠等疏奏擊敗賊衆與援兵會合
兆惠等奏言臣等自上年十月十三日被圍賊
人屢次侵犯俱為我兵擊退賊因掘塹築臺彼
此相持此三月內賊引水灌營我兵即決濠宣
洩或以葦埽蔽體及掘溝潛伏俱為我兵焚燒
截殺狡計百出卒不得逞且於帳房附近拾得

賊人鎗礮鉛丸數萬即以擊賊仰賴

聖主洪福惟侍衛富紹等數人陣亡其餘官兵中傷者尚少賊見不能獲利因遣人於營外告稱從前我等擒獻達瓦齊遣人入

覲至今未回今年

天朝因何發兵征討猝圍庫車現在大和卓木自喀什噶爾前來並不知小和卓木抗拒大兵之事祈將軍遣使同我等入

觀等語臣答云

天朝大兵特為聲討霍集占負恩之罪及追拏自伊犁逃竄之逆回厄魯特等與波羅泥都無涉

大皇帝早已洞鑒奉有

諭旨因不知波羅泥都所在是以未經頒給今既到此即應欽遵

諭旨將伊弟霍集占及阿卜都克勒木等并自伊犁同來助惡回人沙喇斯瑪呼斯厄魯特等一併

擒獻隨恭捧

諭旨設於案上令回人等捧去逆賊計窮並無回信
今年正月初八日遙聞北面鎗礮聲知援兵已
集臣等遂於是夜架豎雲梯挑兵千餘名分為
兩翼奮力衝出奪取賊人營壘燒燬高臺勦賊
千餘人生擒五十餘人收獲烏鎗長槍旗纛等
軍器無算即欲往會援兵而步賊雖敗騎賊仍
於遠處窺伺因遣索倫奈圖善伯圖等夤夜繞

道通信臣富德等領兵進剿於十四日早離臣等所駐二十里臣等即帶兵按隊相迎現在合兵一處除此次在事奮勉効力之大臣侍衛官兵導

旨詳查具奏外其如何整兵再進擒獲賊首剿殺逆黨之處公同酌議續奏奏入報

聞

定邊右副將軍富德等疏奏擊敗賊衆與將軍

等會合

富德等奏言臣等於正月初六日在呼爾璘遇賊轉戰五月初十日得兆惠咨文即令來人轉覆十二日伊等復回據稱賊人卡倫火光甚大不能前進臣等即於十三日整兵二鼓起程五鼓至葉爾羌河岸偵探兆惠軍營相距二十里望見賊營烟火即行駐兵與領隊大臣侍衛等分定中軍兩翼排列整齊十四日黎明前進約

行六七里左翼見有賊兵直前攻擊賊並不接戰會入賊人右隊而去時我兵右翼臣阿里衮愛隆阿即領侍衛伍岱營總金集噶爾等以鎗礮接戰敗賊數次餘賊仍依蘆葦放鎗臣富德舒赫德同侍衛瑚什老格領左翼兵急進賊遂渡河而逃計勦賊二三百人我兵陣亡者二人得傷者十餘人又防範城內賊人突出夾攻臣富德舒赫德福祿領中軍自右翼以次進攻但

未知兆惠軍營附近有無賊衆因一面令左隊
之護軍統領努三副都統鄂博什各領馬兵堵
截賊人尋覓將軍營盤告知援兵已到將軍之
兵應於首隊排列以示聲威且可勦殺逸賊旋
據努三等告稱我等直抵將軍營內自將軍大
臣以至官兵俱各無恙因無馬匹是以明瑞由
屯溫布端濟布等領步兵向我首隊排列前來
等語臣等一面追賊渡河一面辦理官兵乘騎

馬駝令努三等迎接將軍兆惠等官兵現在臣
等兩路官兵會合一處是晚起行行三十里十
五日行二十餘里雖遠見賊人覘望形跡總因
屢敗不敢來犯現派帶領馬兵之努三鄂博什
由屯溫布等為殿以回阿克蘇其奮勉効力及
陣亡得傷官兵謹列單具奏奏入報

聞

恩諭陞賞將軍大臣侍衛官兵等

上諭軍機大臣曰據軍營奏報將軍兆惠富德等聲
援既接分領官兵奮勇勦賊合軍一處整頓兵馬
再行進勦覽奏殊為欣慰此實

上天眷佑之恩朕不勝欽感至將軍大臣侍衛官兵等
奮勉効力允宜優叙以示獎勵適據兆惠奏辭封
爵及所賜章服從前因伊被圍固守是以特加寵
錫今果全師制勝何必固辭前固富德迅速應援
屢敗賊衆已封為三等伯今又領兵力戰與將軍

會合厥功懋著著加恩晉封一等成勇伯兆惠軍
營之侍郎公明瑞副都統由屯溫布總管端濟布
富德軍營之護軍統領努三副都統鄂博什默爾
根巴圖魯瑪瑞散秩大臣永慶俱交部議叙給與
世職二等侍衛瑚什卓里克圖巴圖魯額訥慎訥
齊訥伯克巴圖魯老格福永俱著授為頭等侍衛
三等侍衛傅靈安克丑巴圖魯諾爾本庫爾察巴
圖魯扎延保額爾克巴圖魯海蘭察鄂畢達達克

塔納瑪格莽喀察公特通額豐安豐訥亨額爾登
額永德塔爾海科普薩塔蘇爾海巴圖魯占頗圖
哈坦巴圖魯瑪呼克爾齊克衣巴圖魯占丕納默
爾根巴圖魯伍岱俱著授為二等侍衛正黃旗三
等侍衛額爾登額著補授二等侍衛賜號噶畢雅
圖巴圖魯仍賞銀一百兩藍翎侍衛烏爾登永泰
滿柱烏爾圖納遜蒙固勒棟保伊達木扎卜獎賞
孔雀翎之藍翎侍衛塔尼布侍衛上行走之護軍

校福保獎賞孔雀翎之索倫驍騎校巴勒琿俱著
授為三等侍衛獎賞孔雀翎之察哈爾護軍署叅
領茂海賽音伯勒克著授為防禦在叅領上行走
索倫協領安提木保著賞給副都統職銜副總管
阿爾哈爾沁著補授總管吉林佐領布爾哈著補
授協領署前鋒章京觀音保前鋒侍衛常保柱俱
著准其實授索倫驍騎校雅卜唐阿著授為防禦
喀爾喀公朗衮扎卜著授為鎮國公賞戴雙眼翎

阿拉善輔國公衮楚克著授為鎮國公又

諭曰兆惠奏稱侍讀學士溫福從軍勦賊面中鳥鎗傷手中槍傷且諸事奮勉効力等語溫福著加恩補授內閣學士又奏稱乾清門二等侍衛富紹勦賊陣亡富紹年來甚屬効力今又臨陣捐軀甚屬可憫著交部照例議卹給與世職此次陣亡得傷官兵等俱著查明送部照例叙卹又

諭曰富德等奏稱提督豆斌總管三都卜俱以負傷

身故等語甚屬可憫豆斌著加恩照旗員一品大臣例交部議卹給與世職三都卜著照陣亡例議卹豆斌所遺提督員缺著閔相師補授所遺總兵員缺著五福補授遊擊職銜榮保隨富德立功著加恩授為總兵

叅贊大臣巴祿等疏奏領兵策應軍營

巴祿等奏言臣等於正月二十二日駐兵巴爾楚克得富德擊敗賊衆之信離兆惠軍營僅四

五十里計此時應已會合一處恐賊入窮蹙以死抗拒必須多兵協助臣等所領兵一千二百餘名俱係精銳現有送到馬匹一千有奇分給兵丁惟哨探攻勦始行乘騎臣巴祿阿桂巴圖濟爾噶爾瑚爾起即於本日起程又准永貴咨稱和闐等城被賊侵犯急需馬兵二三百名協助等語臣等伏思策應軍營更關緊要即令派往和闐又須轉回阿克蘇恐徒勞往返是以未

能應付奏入報

聞

阿克蘇辦事侍郎永貴疏奏策應和闐情形

永貴奏言正月十九日准侍衛齊凌扎卜散秩大臣伯克鄂對等遣回人呢雅斯呈稱逆回賊黨鄂斯璫阿卜都克勒木阿卜達哈里克遣塞頗爾等統衆六百於十一月二十六日來犯額里齊哈喇哈什肆行搶刦兩城僅有馬兵五十

餘名綠旗兵五百名分守侍衛納爾布於十一月二十一日抵哈喇哈什即派滿洲通事哲勒順等先往克勒底雅守禦不意二十六日賊人鄂斯瑞統衆前往克勒底雅有本城回人默默里提卜鄂斯瑞哈子二人誘守城人飲醉晝夜開門放入哲勒順被害現在兩城糧草甚乏人心搖動賊人不時發書迫脅恐生內變請速發精壯馬兵數百名於正月內趲來救援等語臣

等前因齊凌扎卜等請發兵馬隨將阿里衮所
留之馬及回人處買來馬匹派兵一百名前往
今復據請兵救援自應速為辦理適有預備調
用馬二百餘匹到營隨派吉林察哈爾等病痊
兵丁六十名挑選跟役四十名又伯克鄂對之
妻及衆伯克等派回人五十名自備行糧馬匹
一同起程一面咨商巴祿將伊等所領兵丁內
派出二三百名尚未准咨覆倘有可通融亦陸

續發往奏入報

聞

諭定邊將軍兆惠等堵截賊衆及應援和闐事宜
上諭軍機大臣曰將軍兆惠等現在合兵自應整頓
前進今馬匹口糧俱陸續運送此時宜催督各城
堡及時耕種以資接濟至賊人不耕則無食如耕
則未熟之前我兵即前往蹂躪自必困憊就擒惟
是霍集占等知我必整兵再進恐被擒獲預籌逃

匿之地亦勢所必然計葉爾羌喀什噶爾附近皆
哈薩克布魯特人等游牧素有釁隙必畏其縛獻
不敢逃往伊等曾久住伊犁等處或向北投入俄
羅斯兆惠富德等應留心防範堵截預為辦理昨
巴祿奏稱接永貴咨調馬兵二三百名救援和闐
伊以策應將軍等為要俟到軍營後再議等語是
時伊惟聞富德與賊交戰尚未知兩隊會合想此
時當相機分兵耳但永貴奏稱齊凌扎卜等呈報

賊攻甚急自應作速往援且和闐地廣糧多又當
賊人向東南逃走之路我兵會合則人數衆多且
葉爾羌距彼亦近即著巴祿領兵數百前往策應
庶地方可保亦可減阿克蘇之糧餉兆惠等酌議
具奏再富德曾有從巴勒琿嶺前取喀什噶爾之
奏昨派出西安滿兵二千達什達瓦兵五百由額
林哈畢爾噶趕送馬匹富德如欲於巴勒琿嶺進
兵即著帶滿洲索倫兵迎回與西安滿兵等會合

亦屬妥便伊等相機辦理不必拘泥朕旨俱著傳諭知之又

諭曰將軍兆惠富德等兩隊會合整兵再進逆賊霍集占等將來若計窮逃匿想未必投往哈薩克布魯特或從伊犁向北往投俄羅斯已諭兆惠等籌備堵截但回部通伊犁路多著傳諭將軍成衮扎布等將布延圖烏里雅蘇台兵丁酌派一千名給與口糧以策布登扎布為副將軍福祿車木楚克

扎布為叅贊於青草萌生後越阿爾台西行巡查
額爾齊斯塔爾巴噶台巴勒喀什淖爾等處搜捕
嗎哈沁凡通俄羅斯路徑俱派兵瞭望堵截逆賊
自無所逃策布登扎布其加意奮勉若能擒獲渠
魁於超勇之名更增光寵若派兵不足或派扎哈
沁扎木禪兵丁一二百名照例賞給整裝前往亦
可

平定準噶爾方略正編卷六十八

欽定四庫全書

平定準噶爾方略正編卷六十九

乾隆二十四年二月庚午

以將軍兆惠富德兩路大兵會合

宣諭中外

上諭大學士曰將軍兆惠富德等奏報正月初六等
日富德等領兵援勦轉戰五日四夜兆惠在營聞
聲夾擊所向披靡斬獲無算十四日兩路大兵已

經會合請即乘勢併力進攻擣巢擒賊等語上年
兆惠統衆薄城軍行神速頗合機宜祇緣我師萬
里馳驅馬力疲乏以致一時遮困幸先事綢繆兵
馬俱已在途一經檄調皆得如期雲集是以呼爾
璦之役內外策應大兵刻日會齊軍威丕振雖堅
壁已經三月而自將軍以至官兵悉皆無恙仰賴
上蒼福佑朕心不勝感慰但念一軍困守逾時而後隊
續遣之師及一切軍糈現在源源轉運理宜少為

休息俟厚集其勢可以一舉竣事已傳諭將軍等
令於附近有城之處酌量駐營俟馬匹調齊乘春
和臆力壯健以需繼進特恐選悞無知之徒聞爾
時援師克捷解圍勢同破竹輒謂可以罷兵息事
則大不然毋論逆酋前此辜恩反噬害我王臣難
追天誅即去冬官兵渡河進剿輒敢悍然抗拒稔
惡更深今雖全師整暇如故而元兇罪大惡極凡
我大清國臣民當無不人人切齒使以一戰得志

妄語洗甲韜戈不但國威軍紀難於中止且於政
體亦甚有關係佳兵之戒朕所深凜而征討有罪
自古無可逭之王章且當我國家全盛時兵力現
俱充裕又何不可執言聲罪之理向者兆惠所領
不過三千餘人逆酋悉其殘衆負嶠苟活而將軍
等尚可力守重圍相拒至於三月之久則其么麼
伎倆並無餘力肆行跳梁亦即此可見況此時兵
糧前後輻輳計其成功遲亦不出夏秋間耳若徇

首鼠兩端之浮論姑息了事朕實恥之斷斷不為
也可將此通諭中外兆惠等摺并發

臣等謹案大軍乘勝深入直薄回城時以馬
力不齊逆回因得恃其烏合據險要襲乃退
而築壘黑水悉力固守揆之主客衆寡之勢
幾不相敵然彼蜂屯蟻聚且數萬衆而我軍
以三千人當之賊皆披靡却避惟遙設長圍
遮禦莫敢撓鋒而我將士奮厲整嚴同心敵

嬴伐木以備臨衝則捍衛有資引渠以洩決
水則飲汲攸賴賊衆計無所之因欲持久伺
釁相拒三閱月我軍亦幾憊矣乃援軍適至
內外夾攻賊羣顧驚愕以為自天而降駭竄
狂奔蹂躪斃仆相枕藉於是有呼爾瑞之捷
兩軍遂全旅以振聲威是役也雖由師武臣
宣力效忠克襄偉績自非

睿算周密更番之兵馬豫調在途則抱水救火遼遠

曷濟迨一趣進而應期集事益共仰

幾先之智實兆豐功矣至若二逆酋之僭德反噬螳
斧妄干尤神人所共憤是以

吳蒼申鑒

鴻貺用昭我軍由是出險而亨轉禍為福且掘地而窖
米斯獲穿井而圍解乃胥賊銃不著人而著
樹既藉樵木為薪材復拾鉛丸以擊賊奇徵
靈蹟捷於影響易曰

天之所佑者順信乎其佑順也

諭定邊將軍兆惠等應援和闐堵截賊衆

上諭軍機大臣曰朕因披覽地圖見和闐去葉爾羌頗近阿克蘇則甚遠前舒赫德進兵時即聞賊人侵犯之信且永貴又將齊凌扎卜請兵情事行文已祿則將軍大臣等自當會議發兵應援蓋霍集占雖經屢敗而力尚能攻取和闐我兵雖不能即取葉爾羌等城而往救和闐則甚易看來和闐之

得失惟視我與賊到彼之先後倘為賊所據則我
侍衛官兵及伯克鄂對等豈不可惜且各城伯克
所積資糧皆為賊用再行政取更屬煩費昨已諭
巴祿領兵數百前往駐劄惟速行為要再觀地圖
所列喀什噶爾西北一帶皆布魯特哈薩克游牧
牧烏什城亦頗堅固諒逆酋等必不自投羅網或
從間道越伯特勒庫庫里克畢特里克英阿喇
特等嶺竄入俄羅斯若於此等可通伊犁之路俱

駐兵堵截自易成擒亦粘簽於圖寄示兆惠等其
悉心籌辦勿致免脫

諭三等侍衛達爾黨阿等辦送兵馬事宜

上諭軍機大臣曰據官長保奏稱奉到由阿濟必濟
前赴巴里坤之旨即領達什達瓦兵丁從虔濟起
程等語官長保既仍會達爾黨阿等同行於送馬
一事更屬有益達爾黨阿哈達哈傅景伊柱等俟
官長保至巴里坤清馥即給與應得錢糧會同行

走達爾黨阿哈達哈年長歷練當率先奮勉伊等
俱係舊人自應和衷集事約束兵丁照看飼秣遇
嗎哈沁即行搜勦傳景等協同効力不得以董率
有人遂生推諉再富德前有從巴勒琿嶺進取喀
什噶爾之奏朕已諭伊等若由此進兵當與現在
辦送之兵馬相會再行相機辦理俱著傳諭知之
陝甘總督吳達善疏奏解送軍營馬駝壯隻

吳達善奏言臣辦解阿克蘇馬一萬六千匹西

安滿兵厄魯特兵馬七千匹又押送官兵乘騎
馬三百五十匹共二萬三千三百五十匹二月
初十日俱全數出關并挑餘馬七百匹續送以
備乏斃又青海副都統濟福辦解馬二千匹俟
到日續送巴里坤牧放又甘肅各屬截買商駝
及西安協濟哈密收買共駝三千餘隻供應官
兵尚屬有餘至暫駐吐魯番綠旗兵五千名需
駝一千六百五十隻現在山西解駝七百八十

餘隻餘亦陸續轉解自可無悞仍酌備車騾送
往闕展以資接濟至寧夏道鎮等收解口外採
買牛四千餘隻羊五萬三千餘隻已飭沿途州
縣按站每牛給料二升草十觔每羊料半升草
三觔自肅州出口至安西地多浮土成羣行走
易於噴搶且多戈壁臣酌令分起解往又內地
採買之羊已獲八九千隻續行趕送唯口外食
物昂貴解送牲隻官兵路費未免不敷仰懇

聖恩照解馬之例酌量加增則員役愈為踴躍奏入
報

聞

癸酉

巴里坤辦事布政使清馥疏奏布魯特使臣等
回奏情形

清馥奏言布魯特車里克齊等於二月初四日
自巴里坤起程臣奉到

諭旨即派原任同知通祿等齎捧星馳追及車里克
齊等同護送之侍衛托倫泰達桑阿等明白宣
示據車里克齊稟稱厄魯特哈薩克錫喇從前
並未至我等境內今或潛來藏匿其波羅泥都
霍集占等若果逃來自必挈送至搶掠喀什噶
爾屬城布魯特人必不敢如此不知係何游牧
亦於歸日查訪稟報奏入報

聞

丙子

飭諭阿克蘇辦事侍郎永貴速奏軍前情形

上諭軍機大臣曰今日得永貴奏報朕以為軍前要
事閱之則係將購辦回人麥石之挖穆齊圖調往
阿克蘇辦事又代阿克蘇頭目阿卜都噶頗爾等
謝恩殊無甚關係永貴乃辦事大臣阿克蘇為各
城總匯軍營信息及和闐等處情形自當留心查
訪具奏或一時未得確信亦當聲叙乃全未提及

殊不識事體之輕重著傳諭令其明白回奏

戊寅

定邊將軍兆惠等疏奏籌議進剿事宜

兆惠等奏言臣等欽奉

諭旨籌議整兵再進事宜臣等與額敏和卓等會商
以逆賊霍集占兄弟分守兩城互相救應約計
騎賊五六千人步賊數萬人且葉爾羌本係大
城兵少則不足以攻城略地須得馬步兵二萬

人馬兵較多更善且從內地遠來必須休息月
餘若能於三四月間抵阿克蘇五六月間至葉
爾羌則賊人種麥未收尚可接濟臣等就現在
情形酌議由阿克蘇和闐兩路進兵臣兆惠富
德所領官兵又新調之西安滿營及達什達瓦
兵丁馬兵可得九千餘名軍營綠旗兵千餘又
新調之四千餘及賽里木拜烏什阿克蘇駐劄
之二千餘可得七千餘名其不敷之數於魯克

沁等屯田兵內抽調馬兵計每人馬二匹及官
員乘騎共馬三萬匹又馱載二萬人兩月口糧
軍器火藥共駝一萬隻再臣等抵阿克蘇時未
便駐兵一處除臣兆惠阿里衮巴祿阿桂領兵
駐候馬駝糧餉外分兵一半令臣愛隆阿前往
烏什駐劄以就口糧兼防喀什噶爾一路又臣
等於正月二十六日兵至阿爾吉什與巴祿阿
桂會合知逆賊鄂斯瑞等侵犯和闐侍衛齊凌

扎卜等請兵應援此時恐賊聞我兵暫撤愈加
狂肆應援自不可緩但現在馬力疲乏先揀派
官兵數百名令瑚爾起巴圖濟爾噶爾前往沿
途捉生詢問若和闐守禦如舊即會同馬步夾
擊或已被賊占據則收兵來迎富德俟糧餉馬
匹送到臣富德福祿即領兵二三千名前往接
濟臣兆惠俟辦足五千官兵糧馬再行策應富
德並從和闐往取葉爾羌兩路刻期到日賊若

仍前抗拒臣兆惠富德即前後相機攻擊并堵
截逆賊等逃往拔達克山等處路徑賊若固守
巢穴即掘濠困城分兵略地今臣舒赫德額敏
和卓努三往阿克蘇催趲糧馬先行起程奏入
報

聞

命議叙副將軍富德所領有功官兵

上諭軍機大臣曰據富德奏稱呼爾璫等處勦賊立

欽定四庫全書

平定準噶爾方略正編

卷六十九

十二

功官兵等有三四品官三等侍衛戴孔雀翎者有披甲署驍騎校戴獎賞翎者將索倫總管巴雅爾等十一人列單進呈等語著加恩賞給呼倫貝爾總管巴雅爾二品頂帶打牲處協領署營總金濟噶爾副總管署營總哈坦巴圖魯薩壘叅領署營總博尼俱授為總管三等侍衛侍衛什長多隆武三等侍衛索托隆科打牲索倫三等侍衛固勇巴圖魯伊薩穆俱授為二等侍衛呼倫貝爾佐領署

叅領奇里勒圖著實授叅領察哈爾防禦署營總
斌圖著授為佐領察哈爾總管敏珠爾之弟車凌
多爾濟授為護軍喀爾喀圖謝圖汗部落台吉副
都統職銜額林沁著補授副都統打牲處披甲署
驍騎校額勒頗爾肯著授為三等侍衛又

諭曰富德奏叙勦賊立功之健銳營副叅領以下前
鋒以上富虎等四十人又効力及得傷陣亡官兵
分別造冊送部等語著加恩將富虎等四十人副

欽定四庫全書

平定準噶爾方略正編

卷六十九

十三

叅領陞為叅領署叅領陞為副叅領前鋒校陞為署叅領副前鋒校陞為前鋒校藍翎前鋒長陞為副前鋒校前鋒陞為藍翎前鋒長暫行換戴翎頂俱著遇缺即補其効力官兵著交部議叙行文將軍大臣等以應陞之缺請補其陣亡得傷官兵俱著該部分別議叙議卹

命議叙定邊將軍兆惠所領有功官兵

上諭軍機大臣曰兆惠等奏稱此次効力有功人員

藍翎扎勒桑等三十二人請戴獎賞翎其侍衛成
果等十人原已戴翎將功次列單進呈等語扎勒
桑等即照所請准戴獎賞孔雀翎此內扎勒桑署
營總端濟勒圖驍騎校愛新署護軍校林保等奮
勇進剿攻破賊營扎勒桑著賜號喀喇巴圖魯端
濟勒圖賜號什爾瑪海巴圖魯愛新賜號錫勒哈
達克巴圖魯林保賜號噶克察巴圖魯仍賞銀各
一百兩其厄魯特都噶爾哈什哈瑪勒占得卜珠

爾俄羅什呼策伯克固英哈什哈庫庫勒濟克回
人阿三和卓特穆爾等俱能奮勉効力著俱授為
藍翎侍衛其侍衛成果等十人俱著加一級侍衛
上行走之虛銜藍翎琿齊布恩克濟庫哈斯泰倭
得勒圖應委藍翎前鋒長之前鋒福柱等効力得
傷俱授為藍翎侍衛又

諭曰員外郎伊克坦布隨兆惠等剿賊及巡查營伍
俱能奮勉出力著授為額外郎中遇缺即補至富

德處隨印辦事惟主事赫倫一人著照所請將原
任布政使挖穆齊圖調往軍營其阿克蘇承辦事
務著永貴另行派委

定邊將軍兆惠奏叙綠旗遊擊塞爾凌千總海
起雲二員右副將軍富德奏叙遊擊署叅將黃
世禧等二十九員馬兵潘正學等十三名俱奮
勉効力請賞給應陞職銜遇缺補用得

旨著照所請行

定邊將軍兆惠等奏請吉林原任協領革職効
力委署防禦勦賊陣亡之扎庫齊以職銜咨部
議卹得

旨如所請行

己卯

命陞叙副將軍富德所領効力年久及帶傷効力官
兵

上諭軍機大臣曰據富德奏稱健銳營獎賞藍翎釋

迦保等十人皆年久應撤懇請効力之人又虛銜
藍翎噶達木保等三人此次俱奮勉勦賊等語釋
迦保拜凌阿錫蘭保富桑阿武勇額著授為額外
前鋒校扎拉芬哈木保六十七太平保文德授為
額外藍翎前鋒長遇缺補用噶達木保賽神保著
授為藍翎侍衛納延保既戴獎賞孔雀翎著加恩
授為三等侍衛又

諭曰富德奏自正月初六日至十四日擊敗賊衆之

欽定四庫全書

平定回疆方略正編
卷六十九

十五

侍衛官兵等有奮勇得傷効力出衆者俱獎賞孔
雀翎藍翎等語已如所奏准其戴用仍著加恩將
藍翎那木扎錫爾庫勒扎勒都侍衛上行走護軍
校額爾色衣獎賞藍翎領催濟木保愛達漢獎賞
藍翎馬甲塞卜騰領催阿特衣前鋒巴爾塔登耨
十人再行查明功績如應賞巴圖魯號者奏請賞
給又獎賞藍翎回人噶里克巴們等五人厄魯特
巴桑等六人俱授為藍翎侍衛至獎賞藍翎馬甲

扎哈納等十人並未註明効力得傷事蹟其因何得賞列入奏單之內著富德查明聲叙那木扎錫爾庫勒是否厄魯特著一併查奏

命調新到闕展綠旗兵丁前赴軍營

上諭軍機大臣曰定長奏稱總兵楊寧帶領綠旗兵六千五百名來至闕展以五千名豫脩進勦餘供糧運屯田差遣惟進勦兵當軍營未經咨調之前若發往額林哈畢爾噶等處耕種則需用農具甚

欽定四庫全書

平定準噶爾方略正編

卷六十九

十六

多一時不能趲辦請就近令往哈密駐候俟來年再為調撥等語所見殊屬拘泥從前厄魯特等耕墾之時何嘗運送如許農具且前諭綠旗兵丁候調尚需時日與其閒住不若從事耕作亦係通融酌辦協助屯兵廣開地畝之意非即以此定作屯田兵額也但此等興屯之地於魯克察克兵丁內抽調開墾亦無不可著將綠旗兵五千名發往兆惠軍營

諭陝甘總督吳達善等酌量趕送軍需羊隻

上諭軍機大臣曰定長等奏鄂爾多斯阿拉善及甘
州涼州所辦軍需羊隻尚未送到現在大兵會合
正資接濟已行文陝甘督撫速為解送等語軍需
固宜速到但此項羊隻係豫備官兵口糧前令於
青草茁茂之時沿途牧放約五月內送到今雖當
春令而草尚未萌若即令趲行必至傷損可傳諭
吳達善五吉將辦送闢展羊隻嚴飭解送官兵務

於沿途酌量緩急加意收放既無悞軍需亦不至
疲瘦不堪虛糜經費併傳諭定長等知之

乾清門侍衛烏三泰以齎奉

恩賞前至軍營願留効力

命如其所請

軍機大臣奏請行查散秩大臣達什策凌等信
息

軍機大臣奏言臣等遵

旨查詢軍營所奏厄魯特策伯克効力行走單內散秩大臣達什策凌等哨探兵一百名被賊截斷之處查去年十一月兆惠等奏稱派巴圖魯侍衛喀喇瑞綽爾圖散秩大臣達什策凌領哨探兵二百名等語以後伊等行走如何並未奏報請行文將軍兆惠等查奏奏入報

聞

庚辰

諭定邊將軍兆惠等查拏瑪里格爾巴朗

上諭軍機大臣曰前聞瑪里格爾巴朗投入回部曾
諭兆惠留意查拏昨據納旺奏哈薩克錫喇在布
魯特已諭車里克齊拏送伊若被逼亦投回部務
期二賊併獲毋致疎脫

三月壬午

議籌辦軍營馬駝事宜

陝甘總督吳達善奏言臣准將軍兆惠密咨和

聞阿克蘇兩路派兵二萬名用馬三萬匹駝一萬隻自應豫為籌備查先後送馬二萬四千五十匹俱全數出關今兆惠奏稿有馬不足數即派兵一萬名之語是所送馬匹已足敷用但進剿所關更宜寬裕現在委員將甘肅等處留牧馬內有四五分臆者再選二三千匹可於三月初出關送至巴里坤備用至現在直晉二省及西三盟共辦駝七千隻今需駝一萬除已給西

欽定四庫全書

平定回疆方略正編
卷六十九

十九

安滿兵厄魯特兵一千四百餘隻外又豫備綠旗兵一千六百餘隻尚應送軍營駝六千八百餘隻計不敷駝隻一千五百餘查有運送阿克蘇軍需及前後乘騎駝隻可以撥補或前項辦解之駝不能依期支給應將糧運臺站駝隻先行截撥俟續到補缺至糧運駝隻既經移用恐有不敷現有騾頭一千五百餘可以協濟至各處購買羊隻及闢展留牧北路馬牛羊隻均可

以次運送於軍食亦無貽誤奏入得

旨軍機大臣速議具奏尋議軍營馬駝固所急需亦期酌歸實用不必拘泥來文牽合虛數今該督所准兆惠咨送奏稿係未到阿克蘇以前不知內地解送馬匹各數其需用三萬匹不過籠統計算該督只應將現在留牧馬匹飼秣臚壯接續前起出關馬匹以備調撥若此時照來文數目便行挑解毋論易致疲乏即星夜送至阿克

欽定四庫全書

平定準噶爾方略正編

卷六十九

二十

蘇而大兵已經進勦亦屬緩不濟急如必俟馬
匹到齊則進兵轉致遲悞該督所請再行挑選
馬匹之處應毋庸議又軍需駝隻既經陸續出
關自可接濟若將糧運臺站之駝先行截撥則
現在已有遲悞且續到之駝遠行疲乏驟令負
重轉運必致倒斃於兵糈臺務兩有關礙亦毋
庸如此辦理至所稱添補糧運騾頭應聽酌量
協濟其各處趕送牛羊亦應申飭安速解送以

濟軍食可也奏入

上諭曰如所議行此議及吳達善奏摺著傳諭該將軍及該督知之總之將軍等原奏頗形難進之意而該督所辦亦不過敷衍成文原無實濟若黃廷桂在必不肯如此朕實痛惜良臣益為憤懣耳

諭阿克蘇辦事侍郎永貴酌辦購買回人糧石

上諭軍機大臣曰吳達善奏稱查永貴咨送奏稿所定購買回人糧石價值較去秋時尚覺矩少現在

內地運糧至闕展每石即需腳價將二十兩應請
諭照時價增加庶回人踴躍求售而運費所省實
多等語所奏亦是軍營糧運自應照常接濟至購
買回人糧石雖較運價甚為節省究係一時權宜
非經久之策若盡收回人積蓄於伊等生計殊無
裨益嗣後辦買糧石應酌看其實係情願始行增
價購備不可勉強從事

命賞給青海王公等捐輸馬駝價值

上諭軍機大臣曰據濟福奏稱青海王公等因辦送馬二千匹蒙恩加給價值其倒斃者亦減半給價情願捐輸馬七百餘匹駝三百二十餘隻等語誠悃可嘉著加恩照所增之價賞給分撥涼州莊浪滿營西寧綠旗營牧養備用

癸未

諭定邊左副將軍成袞扎布等辦送戰箭各事宜上諭軍機大臣曰據兆惠奏將烏里雅蘇台存貯戰

箭十萬枝調送軍營又據清馥奏巴里坤有箭三萬枝哈密有箭七萬枝即派員先送軍營仍行文五吉將續到之箭暫貯巴里坤豫備等語烏里雅蘇台戰箭仍須巴里坤轉送長途既難尅期且清馥等業經照數發往自不必續送可傳諭成衮扎布等此時若未經解送即行停止或起程未遠亦即追回

申諭定邊將軍兆惠等速行進剿應援

上諭軍機大臣曰數日來陝甘巴里坤等處奏事皆因兆惠等調發軍需頗覺周章退縮至兆惠富德昨議兩路進兵俱抵葉爾羌其喀什噶爾並未籌及頃諭舒赫德同伯克霍集斯駐劄和闐堵截逆賊等逃竄要路各城回兵既可調集則我兵不必多留兆惠從阿克蘇進取葉爾羌富德或從特穆爾圖卓爾或從烏什進取喀什噶爾似屬有濟但慮伊等志氣先餒難於振作耳適閱清馥奏兆惠

將巴里坤等處沿途存留之滿洲索倫蒙古等兵
丁盡行調發其意可知軍營現兵近二萬人又何
須搜括及此伊等曾以少擊衆潰圍決勝合兵而
旋無敢追襲者賊之伎倆可知若謂賊多馬力不
過從前掠取阿睦爾撒納之馬數千匹既無從購
辦且屢次傷殘以我萬騎取數千賊衆何敢抗行
且所運大神等礮實為攻城利器鋒鏑之銳又不
待言我兩路分兵兩城必顧此失彼乘間擣虛一

舉可得可傳諭兆惠等其毅然決策以奏膚功所
有商辦機宜作速奏聞

甲申

叅贊大臣舒赫德等疏奏和闐各城信息

舒赫德奏言二月初十日據侍衛噶布舒散秩
大臣鄂對等遣回人阿舒爾和卓報稱賊黨阿
卜都克勒木鄂斯璫等領衆分攻額里齊哈喇
哈什玉隴哈什三城守禦已六十日又克勒底

雅齊爾拉二城之伯克及所屬三百餘人逃至
額里齊二城已為賊據祈速發兵救援等語臣
等詢問阿舒爾和卓據稱克勒底雅於去年為
鄂斯瑞所據伯克阿里木沙率所屬二百人投
額里齊其餘三千戶皆被陷阿里木沙之子被
賊阿卜都哈里克縛至額里齊城下俾見其父
而殺之齊爾拉城鄂斯瑞哈子率百餘人投哈
喇哈什其妻子與三百餘戶皆被陷又聞玉隴

哈什伯克烏努斯亦率其二千七百餘戶來額里齊餘三百餘戶入於賊今哈喇哈什侍衛齊凌扎卜伯克海里雅木哈子阿瓦斯默特等領綠旗兵回兵四千餘額里齊自正月十五日以後賊攻更急現有索倫兵七十名綠旗兵三百名回人六千餘糧餉火器俱可支至二月下旬惟玉隴哈什城虛無人而現在所守二城亦有晝夜逃出者克勒底雅被掠回人亦有同賊攻

城者惟作速發兵往援等語臣等伏思永貴前發兵二百五十名及兆惠所遣之瑚爾起等月內可至和闐臣等仍於續到兵馬及各城回人馬匹儘力速辦以備調用奏入

上諭軍機大臣曰舒赫德奏據駐守和闐侍衛等呈報賊攻頗急若援兵遲滯難於守禦等語看來富德等與兆惠合兵即當往援不但解圍救困且可駐兵進取從前舒赫德有和闐糧足駐兵之奏何

以合兵時未見議及著據實奏聞至侍衛等所報
各城伯克等被迫來投并力固守且有妻子被害
者深為軫惻自應加恩優卹俟事定後著舒赫德
查明具奏若和闐各城既定兆惠富德等分兵攻
取葉爾羌喀什噶爾舒赫德同霍集斯駐防和闐
俱遵前旨辦理又

諭曰前兆惠等被圍富德奮勉應援至和闐被圍亦
急何以未聞往救若謂兵力不足則兆惠一軍尚

能與賊相拒況兩隊會合轉患其弱耶若謂馬力不足則既可回抵阿克蘇何難就近赴援和闐因糧以守耶富德此時曾否領兵往援著作速奏聞至兆惠曾為賊困其望援甚切可知以身經艱阻之事而於他人則置之度外何以為情然朕亦不追既往惟促富德速援兆惠亦酌量策應賊如聞風潰散即以進攻葉爾羌等城為要如和闐已為賊據則伊等俱不必前往惟據實奏聞候朕核定

功罪可耳

申諭庫車辦事布政使德舒增給回人糧馬價值

上諭軍機大臣曰德舒奏稱購買阿克蘇庫車回人馬匹及回人等捐助米穀等項賞給價銀過多恐遂成定例日後難於辦理請候議定各城應交實數再酌量賞給等語殊屬拘泥現在逆酋等尚未就擒和闐亦需策應若回人見我大臣等辦事瑣屑未必傾心降服且伊等貪利性成示以裁節或

致妄生追悔若謂將來遂以為例則回部蕩平後
不過酌定貢賦並無購辦糧馬之事何必為此過
慮況以現在辦送馬匹糧餉較之其勞費不啻數
倍自當示以寬大始合機宜看來伊等所定價值
尚覺其少仍須酌量增加應時給發嗣後俱遵照
辦理

諭定邊將軍兆惠等查奏侍衛拜達爾勞績

上諭軍機大臣曰聞侍衛拜達爾於雅哈托和鼎之

戰憤罵同行身先陷陣衆始競進似此奮勉將軍
大臣等自當嘉獎錄叙乃未見舉出陳奏惟保列
逢迎趨避之員何以服人心而作士氣拜達爾現
在何處曾否著有勞績可傳諭兆惠等查明因便
具奏

平定準噶爾方略正編卷六十九

欽定四庫全書

平定準噶爾方略正編卷七十

乾隆二十四年三月甲申

諭定邊將軍兆惠等擗節軍需各事宜

上諭軍機大臣曰兆惠富德等奏稱現在辦理進剿官兵行裝鹽菜等項需銀四五十萬兩咨行定長等以駝隻隨數運送而定長等行查兵數且必候開展駝隻臚壯再咨行永貴等將阿克蘇應辦米

石布疋各數覆到始行辦理恐悞軍行等語定長
等外任習風辦事每多推諉固屬見小而兆惠等
辦理進勦亦甚拘泥查先後解送軍營備用銀兩
將及三十萬自足應用朕於軍行之費非有吝惜
但以官兵所需計之如衣裝布疋雖在內地購買
一時亦難得數十萬則回城所出有限可知至賞
給銀兩即暫時存貯候功成再行補給亦於伊等
生計有益此時官兵等若購買回人之物無裨實

用者尚應禁止豈可任其糜費且伊等從前所奏
捉生詢問及拘執霍集占等所遣回人一切情形
何以未見奏及又布魯特兵丁應否調用哈薩克
錫喇投來回部與否兆惠等進剿時務宜留心辦
理不可徒托空言其辦送兵丁之乾清門侍衛敦
察即著在軍營行走

命優卹隨靖逆將軍納穆扎爾等陣亡得傷官兵
上諭軍機大臣曰兆惠等奏稱隨納穆扎爾等進剿

陣亡之侍衛官員十人兵一百五十餘名又得傷
兵六十餘名分別列單進呈造冊送部等語前據
愛隆阿奏報侍衛奎瑪岱陣亡比即加恩照奇徹
布之例給與世職此次查奏之三等待衛章武著
照奎瑪岱例藍翎班泰照三等待衛例俱給與世
職吉林叅領固爾特衣喀喇沁臺站四品叅領錫
喇卜俱交部照例議卹索倫驍騎校署叅領喀爾
瑪勒圖領催署叅領瑪提木保察哈爾驍騎校署

防尉阿穆呼朗護軍校署防尉齊旺扎卜前鋒署
護軍校納們俱著照現署職銜議卹陣亡兵丁等
著交部照例議卹至得傷兵丁從前舒赫德曾奏
報途遇脫出兵丁四名此六十餘名曾否與援兵
相遇及得脫情形著兆惠查明具奏

定邊將軍兆惠疏奏被圍後節次情形

兆惠奏言欽奉十二月三十日

諭旨以舒赫德所奏回人托克托默特來告臣等被

圍情形查明具奏查臣等自十月十三日結營
固守後賊見勢難即取亦掘溝築壘起立高臺
施放鎗礮二十二日決水衝灌我營臣即派官
兵掘渠引入下流數日內兼資飲用賊人掘溝
潛伏以葦埽自蔽欲行偷刼俱經擊退其賊所
立高臺四面俱有護身垛口施放雜木巴喇特
烏鎗臣等即立高臺相對自二十二日至十一
月初十日吉林索倫察哈爾綠旗官兵等乘懈

攻奪賊始不敢登犯惟看守營壘十一日賊遣
吐魯番回人及我哨探得傷厄魯特隨將軍納
穆扎爾得傷察哈爾三人前來告稱霍集占抗
拒時波羅泥都本不知情今奉書請和情願捐
助口糧并求親信之人同行入

覲臣等拘留來人將從前頒發波羅泥都令擒送霍
集占阿卜都克勒木之

勅諭恭設几案令對陣回人捧去次日賊人仍申前

說臣遣額敏和卓所屬回人傳示云爾等小醜何敢以和好為詞我大兵來問霍集占叛逆之罪尚不悔悟求生計日兵馬雲集占不置矣賊計窮復施放鎗礮臣等即行抵敵并遣人逼近賊營誘擒生口賊不敢出是月十六日十二月初九日兩次派兵四百名分兩翼呼噪焚燒賊營生擒三人奪取軍器牛隻正月初八日聞數十里外鎗礮聲料必援兵是夜選兵千名造

雲梯衝出焚燒賊壘傷死千餘人生擒五十五人奪軍器無算自此賊人退避惟遠駐賊騎防守此次固守軍營仰賴

聖主威福

上天神佑靈蹟甚多即如臣等安營處喀喇烏蘇在其北戈壁在其東南而我兵於深林中駐劄伐木給用潰圍時尚餘二百餘株初憂乏水以賊人引水灌營獲濟嗣後隨地掘井泉即湧出至正

月初旬井水忽涸營中拾取賊人鎗礮鉛丸萬
億每斫一木即墜落無數而我兵傷損甚少官
兵意氣奮發毫無憂懼之形至舒赫德所奏得
米百六十窖馬駝千餘隻雖屬傳聞但掘塹安
營時曾獲回人埋藏米穀二十餘處每處不過
一二石奏入報

聞

戊子

叅贊大臣舒赫德等疏奏酌議回城田賦

舒赫德等奏言臣等前奏阿克蘇等回城歸附
後應行廣種地畝酌定租賦會同阿琿伯克等
公議具奏今議得從前準噶爾苦累回人多取
貢賦年來霍集占惟用威力挾制各城以致地
方凋敝今

聖主仁恩疊沛伊等捐輸糧石仍給以價值回衆無
不懽感臣額敏和卓查回人舊制徵收糧石係

十分取一載在經教至阿克蘇城乃舊汗之公地收穫時則係平分又霍集占從伊犁同來回衆墾種之地俱已閒曠昨因駐兵需糧回人等交米二千四百石頗屬黽勉若將霍集占地畝均給貧人除公地照舊徵收其餘地畝俱十分取一伊等愈為樂業隨傳集阿克蘇賽里木沙雅爾辦事人等曉示俱各情願遵行惟庫車甚為殘破似應另議烏什現有貝勒品級伯克霍

集斯往辦馬匹請行文令其酌定將來平定葉爾美喀什噶爾再行定議辦理奏入

上從之

諭定邊將軍兆惠等查詢伯克霍集斯事宜

上諭軍機大臣曰適據舒赫德奏伯克霍集斯有往烏什辦馬之舉伊果係抒誠効力或虛應故事俱當察看酌量賞賚至前諭富德由特穆爾圖淖爾進取喀什噶爾未免太遠若烏什有相通之路則

更便易亦詢之霍集斯酌量辦理一面奏聞

命齋欽差大臣關防給阿克蘇辦事大臣行文鈐用

己丑

申諭定邊將軍兆惠等酌停咨調馬匹銀兩

上諭軍機大臣曰吳達善奏據定長等咨稱兆惠調取闊展等處存留索倫察哈爾兵五百名應撥馬一千匹於二月二十八日出口又撥銀三十餘萬由哈密解送軍營等語辦理軍需當籌實濟不宜

徒張虛數現在阿克蘇等處會集官兵陸續趲送馬駝量已足用此時調取兵馬已不及進剿之期於內地徒增煩擾且兆惠等所辦如咨取賞銀四五十萬多未妥協阿克蘇非內地都會可比豈必需用如許銀兩致官兵人等任意糜費向來職貢諸國出產金銀往來禁止越界今即擒獲霍集占盡平回部亦仍係外藩豈可以中國財貨耗費於回地而不知惜已諭吳達善此次兵馬出口後無

庸再為調撥其已撥之三十萬兩五吉接收後仍
存貯哈密以所辦駝隻運送口糧尚屬切要俱著
傳諭知之

庚寅

諭開展辦事副都統定長等不必遷移臺站

上諭軍機大臣曰定長奏稱准已祿洛送奏稿請將
哈喇沙爾至庫車一路臺站移向伊拉里克朱爾
都斯至賽里木安設水草較好但舊設臺站現運

口糧亦未便遽行裁撤等語朕經軍機處議以舊
臺行走一年既已熟習現在糧運絡繹只應酌量
添補馬駝若兩地俱設轉覺煩費應無庸議著傳
諭定長遵行至巴祿昨請辦理臺站今既不必遷
移即可前赴軍營其巡察臺站添補馬駝之處交
與定長辦理

辛卯

諭定邊左副將軍成衮扎布等派調堵截兵馬事宜

上諭軍機大臣曰成衮扎布等奏稱遵旨派調副將
軍策布登扎布等所領官兵除軍營滿洲喀爾喀
綠旗兵九百名仍留備用外酌派三十三卡倫兵
二百扎哈沁兵二百喀爾喀游牧兵六百共一千
名賞給整裝銀兩於四月起程其應補給馬駝或
折給銀兩另行具奏等語此次出兵特於搜捕嗎
哈沁之便堵截逆回霍集占等逃路現在布延圖
有兵三百著即派入數內將喀爾喀兵減半發往

開塔爾巴噶台博羅呼濟爾俱可通俄羅斯著策
布登扎布等分兵兩隊堵截令派出副都統齊努
渾頭等侍衛烏爾登俱授為叅贊大臣前往著策
布登扎布福祿齊努渾為一隊車木楚克扎布烏
爾登為一隊彼此聲息相通互為策應賊人自難
免脫布延圖兵既經派出著扎隆阿德爾素即為
領隊大臣分作兩隊行走扎哈沁公扎木禪亦著
在領隊大臣上行走照例賞給整裝銀兩至伊等

軍營辦給馬駝不易適據桑寨多爾濟奏於庫倫
購得馬三千餘匹駝三百隻即傳諭令其送馬二
千匹駝一百隻至烏里雅蘇台策布登扎布等此
行不必太速亦不可過緩值此青草萌生伊等將
馬駝派給官兵沿途加意牧養應機奮勉又

諭曰桑寨多爾濟所購車倫馬駝先選臚壯之馬二
千匹駝一百隻送至烏里雅蘇台其餘送往索岳
勒濟等牧羣內牧養豫備至現在馬駝價值較前

稍昂可酌量增加已諭該部發銀五萬兩交伊收領給價有餘即照所奏於恰克圖購辦馬匹其喀爾喀游牧不必採買

命賞給喀喇沁臺站撤回章京署叅領甘珠爾等十人銀兩

軍營効力之厄魯特巴泰巴魯及家口等由巴里坤來京

命於京城安插

壬辰

諭定邊將軍兆惠等偵探賊衆情形

上諭軍機大臣曰兆惠富德等前奏俘獲人口頗多而未聞詢問情形曾屢諭令其具奏伊等合兵回轉時沿途所有村堡亦豈未遇一人且休息月餘與其閒住不若酌遣兵丁捉生詢問兆惠等當於索倫兵內選精壯者四五百名辦給馬匹分為兩隊前後行走偵探賊人若設有卡倫即行拏獲詢

問若全無防守則其力竭可知即以大兵陸續前進掠其村堡則耕作之人必畏避入城倘遇大隊賊人即或不能勦殺而見我兵分隊行走亦慮有後應不敢前進即可捉生回營旋行釋放給以檄文諭其但能俘獻霍集占餘人皆可不問賊衆未有不動心者我兵撤後賊即再欲耕作而驚擾之下亦已失時必至坐困即使賊人豫作準備示弱相誘而我兵亦即撤回自不墮彼術中朕亦不加

譴責也且索倫精兵至四五百人賊亦斷不敢偪
若派兵前往著富德愛隆阿由屯帶領富德如往
和闐伊二人亦可分隊前進但覽伊等近日奏報
似不能如此辦理或馬匹不足亦當酌量行止此
旨著因便傳諭知之

癸巳

諭三等侍衛達爾黨阿等解送馬匹事宜

上諭軍機大臣曰兆惠等奏稱兩路進兵以每人給

馬二匹及大臣侍衛官員乘騎計之共需三萬令內地辦送之馬僅二萬三千餘匹而西安滿兵達什達瓦兵丁乘騎即在其內其續調馬匹臆分平常者尚在涼州等處飼秣查軍營兵幾及萬馬匹全數送到尚屬不敷若再給西安等兵乘騎以致疲乏且續送之馬稍遲亦不能趲送已行文駐劄哈密等處大臣及送馬大臣等將所送馬匹仍由朱爾都斯一路趲行不可欠缺送馬官兵應令乘

騎原馬或於兒騾馬內酌量添補其西安兵若已
派給馬匹仍撤出解送令暫住閤展俟續到馬匹
辦給等語備勦馬匹自應多為辦送但西安滿兵
不惟備勦亦以押送馬匹若留住閤展則現在二
萬餘馬非達什達瓦之數百人所能照管著傳諭
達爾黨阿哈達哈等西安滿兵仍令前行惟每人
給馬一匹并勻搭行裝於應得馬匹內能撤出二
三千匹更善其達什達瓦兵若已給馬匹亦照此

辦理并傳諭哈密巴里坤開展辦事大臣等知之

又

諭曰兆惠等所奏酌派馬匹一摺殊覺心神恒怯以
逆賊霍集占為大敵試思賊勢果強馬能兩軍會
合耶從前伊等進剿回部時已從準噶爾周行萬
里馬匹疲乏是以被圍朕即早為計及辦此二萬
餘馬匹從容解送其力大勝於前而賊衆創殘之
餘豈敢仍行抗拒且內地馬匹果可寬裕購備自

必多為辦給即以治家之道譬之有餘固不妨誇耀而不足亦未始不可通融其能者費少而盡合機宜拙者費多而徒滋虛耗惟在實心實力善為運用耳已傳諭送馬大臣等將派給兵丁馬匹量為撤出仍令照看行走至若應援和闐則當如救焚拯溺又不可以兵馬之多寡計即著傳諭知之命陞賞効力之侍衛占頗圖等

上諭軍機大臣曰兆惠等奏稱愛隆阿從葉爾羌收

接臺站遇賊人七百餘塔蘇爾海巴圖魯三等侍衛占頗圖常在哨探行走奮勇勦賊得傷吉林虛銜藍翎領催圖音布得傷甚多馬中鎗斃前鋒哈木圖庫署驍騎校哈爾吉納奮身救出俱能連射斃賊効力可嘉占頗圖已加恩授為二等侍衛著交部議叙圖音布賜號沙拉瑪海巴圖魯哈木圖庫賜號克德爾巴圖魯哈爾吉納賜號楚庫爾巴圖魯俱授為藍翎侍衛賞銀一百兩仍交部議叙

命閩浙總督楊應琚來京

上諭軍機大臣曰朕以西事尚未告竣軍需關係緊要從前黃廷桂在日辦理一切動合機宜因念楊應琚久任甘肅熟悉地方情形且能實心任事可傳諭令其作速來京陛見面聆訓誨并將軍需事宜悉心查閱以資督辦之效俟到時再降諭旨其閩浙總督印務著楊廷璋署理浙江巡撫印務著明山護理

甲午

諭定邊將軍兆惠等辦送馬匹及進剿事宜

上諭軍機大臣曰據達爾黨阿等奏稱通計馬匹出口日期三月初三日全抵巴里坤擬從木壘至烏魯木齊塔爾巴噶台朱爾都斯過庫庫努特嶺抵阿克蘇現在送馬一萬六千匹以五百匹為一起共三十二起以一日八起為率分派官兵管押等語伊等辦理甚好昨兆惠等奏報行文撤出西安

滿兵馬匹令兵丁留住關展朕諭量為抽撥仍行
押送諒達爾黨阿等亦未必據咨辦理看來送馬
一萬六千以兆惠軍營所存及舒赫德等所購回
人之馬計之不下二萬匹似不為少將來進兵時
令兵丁騎步兼行以紓馬力雖暫覺勞苦正可見
報効之誠惟宜乘機進取通融酌辦至此次進剿
昨諭兆惠取葉爾羌富德取喀什噶爾今思和闐
待援甚急富德即宜前往就近堵截痕都斯坦之

路兆惠自阿克蘇進攻葉爾羌時能擒獲渠魁固
善萬一竄至痕都斯坦等處與富德相遇自必成
擒或敗走至喀什噶爾兆惠一面追襲作速行知
富德就近夾攻似屬長策俱著伊等相機辦理

丙申

諭定邊將軍兆惠等撫卹兵丁事宜

上諭軍機大臣曰近因明瑞來京朕詢以軍營情形
知兆惠被圍三月實為勞苦富德速往應援甚屬

奮勉伊等同心協力如此深為嘉予至合兵後未
稍為駐候亦未速往和闐皆意見不到處和闐設
有疎虞朕即念前功不加罪譴伊等自問於心安
乎又聞軍營綠旗兵病故者三百餘名圍解時將
有病者續行護送又多致斃所派守護病兵之索
倫等取其烏鎬而病兵不肯給與致有爭奪之事
等語兵丁有病自宜撫卹非可漠不相關且此等
病人尚能爭奪烏鎬非不可拯救者索倫兵雖嫻

於戰陣而護視病兵豈能體卹惟知早取軍器交
官便可了事將軍等於兵丁當一體愛惜或令病
者乘騎前行而護視者步行相送方便衆心感服
何忍於棄置乃爾著將此等情節明白回奏再我
大臣等方遇艱難未嘗不一心黽勉至事體既過
則頗生同異此等習氣最宜深戒若能遵循朕訓
何功不成可因便傳諭知之

命優卹侍衛瑞綽爾圖等

上諭軍機大臣曰據明瑞奏稱二等侍衛璊綽爾圖三等侍衛拜達爾藍翎侍衛喀喇等俱以遇賊陣亡深可憫惻璊綽爾圖等著加恩照富紹例議卹給與世職其散秩大臣達什策凌已諭兆惠等查明旗分子嗣再行加恩議卹

命獎賞吐魯番回人賚子翎頂緞疋

上諭軍機大臣曰舒赫德等奏稱阿克蘇回人托克托默特見有嗎哈沁踪跡告知吐魯番回人賚子

同索倫官兵等往追俱已收取供係厄魯特輝特
台吉為回人默默雅爾所獲明知故縱仍給以口
糧隱匿不報業將默默雅爾正法示懲等語額敏
和卓所屬回人賚子素能効力一聞有嗎哈沁即
行窮追深屬可嘉賚子著加著獎賞孔雀翎及頂
帶緞疋所擒之嗎哈沁即賞給額敏和卓可也
命叅贊大臣愛隆阿仍以領隊大臣行走

戊戌

諭定邊將軍兆惠等酌派進剿官兵等事宜

上諭軍機大臣曰據達爾黨阿等奏稱准兆惠咨令
西安滿兵在闕展等處暫駐候續送馬匹再行辦
給但解送馬匹必須多人照管不便留駐業經報
明將軍等語所辦甚是頃兆惠等以此具奏朕即
以西安滿兵兼為解送馬匹仍著照舊前往今達
爾黨阿等所奏與朕旨適相符合看來兆惠富德
合兵後所辦事件前後多自相矛盾即如伊等昨

將巴里坤哈密等處存留之索倫察哈爾兵逐名
查出發往今又將西安滿兵存留全不計及二萬
餘馬匹應需兵若干解送朕意與其將西安滿兵
留駐闢展不若截留軍營綠旗兵防守阿克蘇若
總不需用即發往屯田或竟令其各歸營伍現在
總兵楊寧已領綠旗兵五千名前往乘其新到或
可得力可傳諭兆惠等即遵照辦理適據明瑞奏
稱健銳營前鋒不待雲梯直薄賊寨屢次克捷已

獎賞翎頂等語此等奮勉之人仍應加恩著兆惠等將先登陷陣官兵查出指名具奏候朕酌賞巴圖魯號所得和聞信息若何作速奏聞

命以領隊大臣公明瑞為叅贊大臣

己亥

命議叙辦送馬匹之大臣官兵等

上諭軍機大臣曰據明德奏稱辦送軍營馬匹二萬四千有奇全抵巴里坤分隊起程等語此次進剿

馬匹所關緊要令自肅州妥協送至巴里坤甚屬
可嘉所有承辦馬匹之大臣官員著交部議叙其
送馬至巴里坤官兵著吳達善明德等查明具奏
將官員交部議叙兵丁酌量獎賞

命加叅贊大臣公明瑞封號

上諭軍機大臣曰明瑞宣力軍前奮勉可嘉著加恩
賜號毅勇於伊所襲公爵晉封為承恩毅勇公

命陞賞軍營効力侍衛瑪格等并優卹侍衛寧古禮

上諭軍機大臣曰明瑞奏稱二等侍衛瑪格三等侍衛烏勒德克索倫獎賞藍翎前鋒署叅領嘉哈圖獎賞藍翎領催羅托在軍營奮勉効力等語瑪格著加恩賜號哈什哈巴圖魯烏勒德克賜號格勒爾圖巴圖魯嘉哈圖賜號伊德爾巴圖魯羅托著授為藍翎侍衛賜號肯特克巴圖魯照例各賞銀一百兩所奏陣亡之二等侍衛克丑巴圖魯寧古禮著交部照富紹例議卹給與世職

命賞乾清門三等侍衛塔瑪鼐整裝銀一百兩隨叅贊大臣明瑞馳驛前往軍營

庚子

申諭定邊將軍兆惠等曉示布魯特發兵事宜

上諭軍機大臣曰前諭兆惠等以可否令布魯特發兵協勦事宜議奏令思若需用布魯特人當遣人往伊等游牧曉示云大兵初攻葉爾羌時曾令爾等派兵協助爾等以冬寒雪盛為詞尚非無故後

大兵雖稍稽捷奏而勦賊頗多今復整兵大舉逆賊等無難計日就擒爾等歸順天朝蒙大皇帝厚恩自當派兵協助以抒誠悃且為將來受恩之地或不願發兵甚至欲助回人亦惟爾便但爾等游牧距喀什噶爾不遠我兵攻取葉爾羌喀什噶爾後再行定奪可耳爾等若仍以力量不足為詞亦並不強爾協助惟霍集占等倘被迫投入爾境內則自當速為縛獻若再漠然坐視必行根究矣如

此曉示看其言語情形若何再籌畫機宜具奏
諭定邊左副將軍成袞扎布曉示哈薩克事宜

上諭軍機大臣曰昨命策布登扎布領兵堵截逆回
及搜查嗎哈沁等所過之塔爾巴噶台等處與哈
薩克邊界甚近伊等甫經歸順見大兵壓境妄生
疑懼亦未可定今哈薩克入覲人等尚在歸途著
成袞扎布候前次起程之哈薩克使臣及此次出
痘新愈之俄羅斯蘇爾統等抵烏里雅蘇台時

告以西路大兵進剿回部恐逆賊等窮迫投往俄
羅斯經由爾等游牧因於北路派兵堵截若賊首
入爾境內大兵直入追捕斷不驚擾游牧爾等有能
擒獻者將軍大臣奏捷叙功大皇帝必加恩賞今
爾等回抵游牧可將此情節告之阿布勒巴木比
特阿布賚等通行宣示可傳諭知之

三等侍衛納蘭圖等以護送哈薩克入

貢馬匹進京

賜納蘭圖蘇朱克圖巴圖魯號賞銀一百兩隨明瑞
前往軍營其吉林前鋒珠爾薩等四人遣回游

牧

壬寅

命陞賞重傷官兵并酌留効力年久之侍衛等

上諭軍機大臣曰兆惠等奏稱軍營効力之藍翎侍
衛錫勒圖訥等十七人得傷較重業經平復懇請
留營勦賊等語伊等幸獲痊愈仍憤思報効深可

軫念著加恩將藍翎侍衛錫勒圖訥授為三等侍
衛索倫署叅領喀爾庫准其實授驍騎校邁勒圖
巴爾虎俱授為防禦健銳營前鋒獎賞藍翎佛保
索倫領催獎賞藍翎雅喇木保俱授為藍翎侍衛
索倫馬甲拉爾奇魯昆濟木保高濟保錫敦車騰
固勒圖根敦俱授為領催察哈爾領催齊凌旺舒
克著授為驍騎校厄魯特獎賞藍翎都喇勒哈什
哈巴彥授為藍翎侍衛額敏和卓之護衛錫丕阿

雅斯巴圖爾霍集斯所屬獎賞藍翎阿里木巴圖爾著將軍等酌量獎賞銀兩又

諭曰前諭令來京之副都統瑪瑞侍衛老格等據兆惠奏稱伊等願留軍營効力等語瑪瑞等久在軍前故准其更換昨富德進兵瑪瑞老格奮勉得傷又令瑪瑞先同明瑞前來可傳諭兆惠等瑪瑞仍遵前旨來京其巴圖魯侍衛老格等如行走尚能出力即留營調遣或有名無實仍著來京其革職

効力之原任將軍錫特庫年已衰老亦著調回

議撥補駝隻事宜

叅贊大臣舒赫德等奏言准兆惠等咨稱富德
往援和闐應需駝一千隻查阿克蘇並無另備
駝隻惟近准陝甘總督等辦送臺站軍糧駝隻
一千餘即於此項調撥但空缺必須撥補隨經
移咨軍營據覆稱現在咨取駝一萬隻即於數
內扣除臣等伏思內地購買騾頭較駝隻為易

而氣候水土亦相宜謹酌將所辦駝隻內用騾
一千頭抵補連鞍解送以速糧運奏入得

旨軍機大臣速議具奏尋議軍需駝隻自應多為豫
備但務籌實濟若費繁道遠辦送疲乏又已踰
期亦屬無益今舒赫德所奏仍拘泥兆惠等所
咨一萬之數查上年冬季有解送阿克蘇軍需
駝三千隻又西安滿兵達什達瓦綠旗兵丁及
節次糧運駝隻請令駐劄哈密關展庫車大臣

等於所有駝騾內挑選將軍量為馱載送至阿克蘇視其臆分先後撥用大約可得駝數千隻且籌運糧餉內地既送羊十萬餘隻闢展庫車以往俱已屯田大兵前進正值麥熟亦可因糧接濟則稍減運糧駝隻似亦無礙所有彌補駝隻之騾頭應俾其辦送如蒙

俞允則現在烏魯木齊牧放騾四百頭即交定長等輕裝遣赴阿克蘇應用仍通行兆惠舒赫德定

長吳達善等遵照辦理奏入

上從之

阿克蘇辦事侍郎永貴疏奏添補兵丁衣服情

節

永貴奏言臣欽奉

諭旨將咨取兵丁衣服布疋作何賞給應否扣還之處定議具奏查臣前與德舒酌議因進勦兵丁衣服殘缺必需添補者移咨陝甘辦送布疋針

綠俟送到時先儘阿克蘇等城駐防兵丁留用
餘俱解送軍營添補進剿兵丁仍查造名冊行
知哈密陝甘等處於應領鹽菜銀兩及本營錢
糧內坐扣還項奏入報

聞

丙午

命以西安滿兵撥補軍營缺額

上諭軍機大臣曰定長等奏准兆惠等咨軍營現有

綠旗兵及楊寧所領綠旗兵外再調屯田兵二三
千名辦給軍裝以及步兵萬人之數等語昨兆惠
等慮馬匹不足令西安滿兵暫駐閭展今又調取
綠旗兵前後辦理不相符合且此等兵丁步行前
至軍營力已疲乏亦不可用何如即將西安滿兵
補足缺額著即遵照辦理其屯田兵丁不必另派

戊申

命獎賞賽里木阿克蘇之伯克等

上諭軍機大臣曰據舒赫德等奏稱賽里木阿克蘇之伯克等措辦馬匹接濟口糧甚為出力等語伊等感激朕恩急公輸佃深屬可嘉現在賽里木總管阿瓜斯伯凱及弟貝格齊俱在軍營効力著加恩賞阿瓜斯伯凱二品帽頂戴孔雀翎貝格齊四品頂孔雀翎辦理城守事務之密爾博羅特莫滿亦賞給四品頂孔雀翎阿克蘇副總管頗拉特巴卜商伯克尼雅斯親行田野勸課耕作著加恩賞

頗拉特巴卜二品頂孔雀翎呢雅斯四品頂孔雀翎其益加貳勉以廣恩賚

命護軍統領努三等回烏魯木齊辦事

上諭軍機大臣曰今年哈薩克貿易人等恐來者較多定長不習蒙古語言仍須諳練之員辦理現在軍營領隊人多著傳諭努三永德等即回烏魯木齊承辦哈薩克貿易事務多購馬匹以給軍用歸途之便即可查勘屯田地畝遇有嗎哈沁賊衆亦

酌領綠旗兵搜勦

平定準噶爾方略正編卷七十